

# Kalaallit Nunaanni efterskolinut kiisalu efterskolimiinnermut tapiissuteqartarneq pillugu Namminersorlutik Oqartussat nalunaarutaat

Efterskolit pillugit Inatsisartut inatsisaanni nr. 13-imi, 5. december 2008-meersumi § 1, imm. 3, § 2, imm. 2, § 3, § 13, imm. 4, § 14, § 17 kiisalu § 19 naapertorlugit makku aalajangersarneqarput:

## Kapitali 1

### *Tapiissutisinissamut piumasaqaatit*

**§ 1.** Kalaallit Nunaanni efterskolimiinnermut tapiissutit Naalakkersuisunit imaluunniit pisortaqaarfinit suliffeqarfinnilluunniit Naalakkersuisunit piginnaatitaasunit aningaasanut inatsimmi aningaasaliissutigineqartut iluannit aningaasaliissutigineqartarput.

*Imm. 2.* Tapiiffigineqarnissamut piumasaqaatit makku naammassineqarsimassapput

1) efterskoli ilinniartup atualerfissaa Naalakkersuisunit akuerisaassaaq, aamma

2) tapiiffigineqarnissamut qinnuteqaat piffissaq eqqorlugu tunniunneqarsimassaaq, tak. § 3.

*Imm. 3.* Naalakkersuisut imaluunniit pisortaqaarfiit suliffeqarfinnilluunniit Naalakkersuisunit piginnaatitaasut immikkut ittunik pissutissaqartillugu imm. 2, nr. 2 saneqqussinnaavaat.

*Imm. 4.* Efterskolimiinneq maanaannaq taamaatinneqarpat, imaluunniit ilinniartuq efterskolimiilernissap aallartinnerani takkutinngitsoorpat, tapiissuteqartarneq erngerluni unitsinneqassaaq.

*Imm. 5.* Ilinniartitaanermut naalakkersuisoqarfik tapiissutit utertinneqarnissaannik piumasaqaateqarsinnaavoq tapiissutit siunertanit akuersissutigineqartunit allaanerusunut atorneqarsimappata.

### *Qinnuteqaateqarnermi periaatsit*

**§ 2.** Angajoqqaatut oqartussaatitaasut namminneerlutik ilinniartup efterskolernissaa qinnuteqaatigissavaat.

*Imm. 2.* Tapiiffigineqarnissamik qinnuteqarnermi qinnuteqarfissiaq ilinniartitaanermut naalakkersuisoqarfimmit suliarineqarsimasoq atorneqassaaq.

*Imm. 3.* Qinnuteqarfissiaq kommunimi ilinniartup atuarfigisaani atuartitaanermut ingerlatsivimmit tunniunneqassaaq.

*Imm. 4.* Qinnuteqartup tapiiffigineqarnissamik qinnuteqaat atuartitaanermut ingerlatsivimmut nassiutissavaa, tassunga ilanngullugit ilinniartup ilinniartunngortussatut akuerisaaneranut efterskolimit uppersaasaat.

*Imm. 5.* Atuartitaanermut ingerlatsiviup tapiiffigineqarnissamik qinnuteqaat, ilanngussat imm. 4-mi taaneqartut aamma misilitsissimanermut uppersaasaatip imaluunniit karakterit kingulliit

uppernarsaataasa assilinerat Naalakkersuisunut imaluunniit pisortaqarfinnut suliffeqarfinnulluunniit Naalakkersuisunit piginnaatitaasunut nassiutissavai.

**§ 3.** Qinnuteqaat efterskolimiinnissap ukioq aallartiffissaa sioqqullugu kingusinnerpaamik 1. december atuartitaanermut ingerlatsivimmit tiguneqareersimassaaq.

*Imm. 2.* Qinnuteqaat ukiumi efterskolimiinnissap aallartiffissaani kingusinnerpaamik januarip 15-iani Naalakkersuisunit imaluunniit pisortaqarfinnit suliffeqarfinnulluunniit Naalakkersuisunit piginnaatitaasunit tiguneqareersimassaaq.

**§ 4.** Naalakkersuisut imaluunniit pisortaqarfiit suliffeqarfiilluunniit Naalakkersuisunit piginnaatitaasut tapiissutit akuersissutigineqarsimanersut ukiumi efterskolimiinnissap aallartiffissaani kingusinnerpaamik martsip 15-iani qinnuteqartunut nalunaarutigissavaat.

*Imm. 2.* Naalakkersuisut imaluunniit pisortaqarfiit suliffeqarfiilluunniit Naalakkersuisunit piginnaatitaasut tapiissutit tunniunneqartut pillugit efterskolimut nalunaaruteqassapput ukiumi efterskolimiinnissap aallartiffissaani kingusinnerpaamik martsip 15-iani.

*Imm. 3.* Naalakkersuisut imaluunniit pisortaqarfiup suliffeqarfiilluunniit Naalakkersuisunit piginnaatitaasup atuartitaanermut ingerlatsivimmut qinnuteqaatit ingerlatsiviup nassiussaasa aalajangiiffigineri pillugit nalunaaruteqassaaq ukiumi efterskolimiinnissap aallartiffissaani kingusinnerpaamik martsip 15-iani.

**§ 5.** Ilinniartup angalanissaata piareersarnissaaatuartitaanermut ingerlatsiviup isumagissavaa. Naalakkersuisut imaluunniit pisortaqarfiit suliffeqarfiilluunniit Naalakkersuisunit piginnaatitaasut ilinniartut angalanissaannik aaqqissuisuusimappata najukkami atuarfimmik ingerlatsivimmut bilisit kingusinnerpaamik majip 15-iani nassiunneqassapput.

#### *Efterskolimiinnermik maanaannaq taamaatitsineq*

**§ 6.** Efterskolimi ilinniartup Kalaallit Nunaanni efterskolernini maanaannaq unitsikkumalissappagu angerlarnissaanut aningaasaliisoqartinnagu efterskolip pisortaata ilinniartumik oqaloqateqarnissaaq isumagissavaa.

*Imm. 2.* Oqaloqatigiinneq pissaaq ilinniartup efterskoliani angerlarnissamik kissaateqarnerup nalunaarutigineqarnerata kinguninngua. Oqaloqatigiinnermi peqataassapput efterskolimi sulisoq ataaseq, ilinniartuq, ilinniartorlu 18-it inorlugit ukioqarpat angajoqqaavi imaluunniit ilinniartup ilaqutariit atassuteqarfigisai.

## **Kapitali 2**

### *Tapiissutininik innersuussineq*

**§ 7.** Efterskolit pillugit Inatsisartut Inatsisaat nr. 13, 5. december 2008-meersumi § 12 naapertorlugu tungaviumik tapiissutit innersuunneqassapput Naalakkersuisunit efterskolillu akornanni isumaqatigiissuteqarnerit malillugit.

*Imm. 2.* Taxameteri malillugu tapiissutit, ukiumi aningaasaliiffiusumi ukiumut ilinniartorisassat amerlassusissaattut anguneqartut naapertorlugit naatsorsorneqartut Naalakkersuisut efterskolillu akornanni isumaqatigiissuteqarnerit naapertorlugit tunniunneqassapput. Ilinniartut efterskolimiinnissap aallartinnerani 18-inik ukioqalereersimasut, efterskolip ukiumoortumik ilinniartuisa amerlassusaannut ilanngunneqarsinnaapput, efterskolimiinnissaaq ilinniartup kommunimi atuarfigisaani perorsaanikkut tarnillu pissusiinik siunnersortimit imaluunniit ilinniarneq pillugu siunnersuisumit allakkatigut

oqaaseqaateqarnikkut inassutigineqarsimappat.

*Imm. 3.* Taxameteri malillugu tapiissutit annikillisinneqassapput efterskolip ukiumut ilinniartui qaammatip naanerani ikilisimappata. Tamannali efterskolinut pilersinneqarlaanut atuutinngilaq, tak. Efterskolit pillugit Inatsisartut inatsisaat nr. 13, 5. december 2008-meersumi § 13, imm. 3.

*Imm. 4.* Taxameteri malillugu tapiissutit annikillisinneqassapput sapaatip-akunnerinik 40-nik ikinnerusunik ilinniartitsisoqarpat, tak. Efterskolit pillugit Inatsisartut inatsisaat nr. 13, 5. december 2008-meersumi § 11, nr. 1 aamma 3.

*Imm. 5.* Ilinniarfiup ingerlatsinini unitsippagu, tapiissutit ukiumi atuarfusumi naammassineqartumi kingullermi ukiumut ilinniartut amerlassusaannut naleqqiullugit naatsorsorneqassapput.

Immikkut ilinniartitsinermut aamma allatigut immikkut perorsaanikkut ikiorsiinissamut tapiissutit § 8. Angajoqqaat timikkut tarnikkulluunniit innarluutilimmik efterskolimi ilinniartuutillit akiliutissaat aalajangerneqassaaq, aningaasanut inatsimmi tapiissutissatut qaffasinnerpaatut taaneqartoq aallaavigalugu.

§ 9. Efterskolit pillugit Inatsisartut inatsisaat nr. 13, 5. december 2008-meersumi § 17 naapertorlugu immikkut ilinniartitsinermut aamma allatigut immikkut perorsaanikkut ikiorsiinermut tapiisoqassaaq, ilinniartoq nalinginnaasumik atuartitsinerup iluani isumagineqarsinnaanngitsumik ineriartornermigut immikkut isumassortariaqarpat imaluunniit ikiorsertariaqarpat.

*Imm. 2.* Immikkut ilinniartitsinermut imaluunniit allatigut perorsaanikkut ikiorsiinermut ilaapput

1) ilinniarfiup atuartitsissutaasa iluanni immikkut aaqqissuussamik ilinniartitsineq, imaluunniit

2) tarnikkut, timikkut imaluunniit maluginiutitigut ajornartorsiuteqarnerit sunniutaat ikorsiiviginarlugit killilerniarlugilluunniit sammisassanik suleriaatsinillu ilinniartitsineq sungiusarnerlu.

#### *Tapiissutininik utertitsineq unitsitsinerlu*

§ 10. Efterskolip inatsimmi tapiissuteqarnissamut piumasaqaatit imaluunniit inatsit malillugu allaffissornikkut maleruagassat eqquutinngippagit, Naalakkersuisut aalajangiisinnaapput tapiissutininik uninngatitsiniarlutik, tapiissutit tamakkiisumik ilaannakortumilluunniit unitsinniarlugit imaluunniit tamakkiisumik ilaannakortumilluunniit utertitassanngortinniarlugit. Efterskoli tapiissutininik tamakkiisumik ilaannakortumilluunniit pisartagaqaannarnissaminut immikkut akuerineqarnissamik qinnuteqarsinnaavoq.

*Imm. 2.* Naalakkersuisut tapiissutininik uninngatitsisinnaapput imaluunniit atorunnaarsitsisinnaallutik efterskolip akiliisinnaajunnaartutut nalunaarutigineqarnissaa piumasarineqarpat imaluunniit akilersuinerminik unitsitsippat, imaluunniit efterskolip ingerlatsinerata unitsinneqarnissaa aarleqqutigineqarpat.

*Imm. 3.* Aammattaaq Naalakkersuisut tapiissutininik utertitsinissamik piumaqasarsinnaapput, tapiissutininik naatsorsuinerminni tunngavigineqartut imaluunniit tapiissutit naatsorsornerat allakkut kukkusimappata.

*Imm. 4.* Tapiissutit atorunnaarsinneqartut utertinneqartulluunniit Nunatta Karsianut nakkassapput.

*Imm. 5.* Tapiissutit annertunaarlugit tunniunneqartut tapiissutissanit tulliuttunit ilanngaanneqarsinnaapput.

§ 11. Efterskolip Efterskolit pillugit Inatsisartut inatsisaanni nr. 13, 5. december 2008-meersumi § 7, imm. 2 piumasaqaatinik eqquutitsinnginnera pissutigalugu Naalakkersuisut § 10, imm. 1 naapertorlugu tapiissutit tamakkiisumik atorunnaarsinneqarnissaat aalajangiuppasuk, efterskoli tapiissutininik pisartagaqaleqqissinnaavoq efterskolinut nutaanut maleruagassat malillugit, tak. § 7.

### Kapitali 3

#### *Naammagittaalliorsinnaaneq*

§ 12. Tapiissutit pillugit aalajangiinernut naammagittaalliutit llinniartitaanermut Naalakkersuisoqarfimmut suliaakkiissutigineqarsinnaapput. Naammagittaalliutit aalajangiinerup kingorna kingusinnerpaamik sapaatip-akunnerisa sisamat qaangiunneranni llinniartitaanermut Naalakkersuisoqarfimmit tiguneqareersimassapput.

#### *Atuutilerfissaa pillugu aalajangersagaq*

§ 13. Nalunaarut 1. september 2009-mi atuutilissaaq, ukiumiillu atuarfusumit 2009/2010-miit sunniuteqalissalluni.

*Namminersorlutik Oqartussat, ulloq 3. september 2009.*

Mimi Karlsen

/

Lise Lennert Olsen

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

